

आकाशवाणी

खबरां विजय बजाज कोला,

पैहले खास-खास खबरां:-

1. ब्रिक्स मुल्ये दे राश्ट्री सुरक्षा सलाहकारें ते वरिष्ठ सुरक्षा अधिकारियें दी दिल्ली बैठका च आतंकवादसाइबर खतरें ते आलमी सतह दिएं सुरक्षा चुनौतिएं कन्नै - निब्वडने लेई सहयोग बधाने पर बल दिता गेआ।
2. कतर दे अमीर शेख तमीम बिन हमद अलथानी होरें प्रधानमंत्री नर-ेन्द्र मोदी होरें गी फोन करिये कतर च होए दे हादसे च भारती नागरके दी मौती पर दुख जताया ते जखिम्ये दे तौले नरोए होने दी कामना कीती।
3. भारत नै पाकिस्तान दे कब्जे आहले जम्मूकश्मीर दे हालात पर पाकिस्तानी - रक्षामंत्री ख्वाजा आसिफ़ हुंदे ब्यानें दी सख्तनुक्ताचीनी कीती ऐ।
4. उद्योग ते बपार मंत्री पीयूष गोयल होरें आखेआ ऐ जे भारत ते अमरीका दी आर्थिक सांझबूत ऐ ते अगड़ी बधा करदी ऐ।भ्याली मज़-
5. फीफा फुटबाल विश्व कप च ग्रुप-के च पुर्तगाल ने उज्बेकिस्तान गी 5-0 कन्नै हराई दिता ऐ।

<><><><><><>

BRICS -Meet

ब्रिक्स मुल्ये दे राश्ट्री सुरक्षा सलाहकारें ते वरिष्ठ सुरक्षा अधिकारियें दी दिल्ली बैठका च आतंकवाद- साइबर खतरें ते आलमी सतह दिएं सुरक्षा चुनौतिएं कन्नै निब्वडने लेई

सहयोग बधाने पर बल दिता गेआ। ब्रिक्स देशें दे राश्ट्री सुरक्षा सलाहकारें दी 16मीं बैठक दी प्रधानता- राश्ट्री सुरक्षा सलाहकार अजीत डोभाल होरें कीती। बैठक च मिम्बर-मुखें नमीं उभरदी सुरक्षा चुनौतिएं पर बचार-बटांदरा कीता। बदेश मंत्रालय मूजब-बैठक दरान ऐसे सुरक्षा खतरें पर खासतौरा पर चर्चा होई जेहड़े हुन वैश्विक रुप लेई चुके दे न। प्रतिनिधिएं ऊर्जा- खाद्य सुरक्षा हालात- जलवायु परिवर्तन ते आतंकी गुटें आसेआ नमिएं तकनीकें दे माड़े इस्तेमाल पर चर्चा कीती। बैठक च आतंकवादरोधी ते सूचना ते संचार तकनीक दे इस्तेमाल च सुरक्षा सरबन्धी कार्य समूहें दे कम्में ते उन्दे नतीजें दी समीक्षा कीती गई। राश्ट्री सुरक्षा सलाहकारें हर चाल्ली दे आतंकवाद खलाफ सांझी कार्रवाई दी वचनबद्धता गी फही पक्का कीता। बैठक दे बाद राश्ट्री सुरक्षा सलाहकारें- प्रधानमंत्री नरेन्द्र मोदी हुंदे'नै बी मलाटी कीती।

<><><><><><>

REV.-NSA-RUSSIA

राश्ट्रीय सुरक्षा सलाहकार अजीत डोभाल ते रुस दे राश्ट्रीय सुरक्षा सलाहकार सर्गेई शोइगु हुंदे बश्कार कल नमीं दिल्ली च ब्रिक्स मुखें दे राश्ट्रीय सुरक्षा सलाहकारें दी दंऊ-रोजा बैठक दे बाहरे- इक मलाटी लग्गी। इस गल्लबात दौरान दौनें धड़े बक्ख-बक्ख क्षेत्रें च भारत ते रुस बश्कार दपक्खी सहयोग बधाने दी वचनबद्धता गी फही पक्का कीता गेआ। दौनें लीडरें भारत ते रुस बश्कार पैहले सवा जारी साथ-सहयोग दे कार्यक्रमें च हासल प्रगति दा जायजा लैता। टकोहदा करियै दौनें मुखें बश्कार विशेष प्राथमिकता आहली रणनीतिक सांझ-भ्याली दे चलदे कीती जा''रदिएं कारवाइएं दे तैहत हासल प्रगति दा तफ्सीली जायजा लैता गेआ।

<><><><><><>

PM -Qatar Amir

कतर दे अमीर शेख तमीम बिन हमद अल-थानी होरें प्रधानमंत्री नरेन्द्र मोदी होरेंगी फोन करियें जंदे ऐतवारें कतर दे रास लाफान शैहरा च होए दे हादसे च भारती नागरकें दी मौती पर दुक्ख जताया ते जखिमयें दे तौले नरोए होने दी कामना कीती। प्रधानमंत्री मोदी होरें पीड़ित परोआरें दी प्रति हमददी जताने लेई धन्नवाद करदे होई जखिमयें गी तुरत डाक्टरी मदाद उपलब्ध करोआने लेई श्री थानी हुंदी सराहना कीती। प्रधानमंत्री मोदी होरें पच्छिम एशिया च जारी शांति दे जतनें च कतर दी भूमिका दी सराहना कीती ते कन्नै एह मेद बी बुज्झी जे इलाके च शांति ते स्थिरता बहाल होग।

<><><><><><>

MEA Briefing

भारत नै पाकिस्तान दे कब्जे आहले जम्मू-कश्मीर दे हालात पर पाकिस्तानी रक्षामंत्री खवाजा आसिफ हुंदे ब्यानें दी सख्त नुक्ताचीनी कीती ऐ। भारत नै आखेआ ऐ कि एह ब्यानबाजी पाकिस्तान दिएं नाकामिएं गी छपैलने ते उत्थै मनुक्खी अधिकारें दी खलाफवर्जी दी स्थिति परा दुनिया दा ध्यान भटकाने दी कोशश ऐ। विदेश मंत्रालय दे प्रवक्ता रणधीर जैयसवाल होरें आखेआ कि पाकिस्तानी कब्जे आहले जम्मू-कश्मीर जिसी ओ अजाद कश्मीर आखदे ऐ- उत्थै बड्डे पैमाने पर विरोध-प्रदर्शन इस करियें होआ करदे न- कीजे पाकिस्तान उत्थू दे लोकें पर जुल्म ज्यादातियां ते अत्याचार करै करदा ऐ ते कैई दहाकें थमां उत्थे आर्थिक शोषण मनुक्खी अधिकारें दी खलाफवर्जी होआ करदी ऐ ते लोकें गी जीन जीने लेई लोड़चदी बुनियादी सूलतें ते अधिकारें कोला

महरुम रखा करदा ऐ। जैयसवाल होरें मेद प्रगट कीती जे आलमी बरादरी पाकिस्तान
गी ओहदियें कनीतें ते भैड़िं करतूतें लेई जवाबदेह ठहरण।

<><><><><><>

Govt. Ethanol

केन्द्र सरकार नै आखेआ ऐ जे इथेनाल रले दा पेट्रोल- वैज्ञानिक तौर पर प्रमाणित ऐ
ते एददी लगातार निगरानी कीती जा'रदी ऐ। निगरानी च तेल कम्पनियां- गड़्डियां
बनाने आली कम्पनियां- ईंधन दी जांच आहली एजेंसियां ते होर बी सरबंधत पक्ख
शामल न। सरकार नै साफ कीता ऐ जे सोशल मीडिया पर इस सरबंधै च चला
करदिआं खबरां भरम-भलेखे आलियां ते बेबुनियाद न।

<><><><><><>

Goyal -US Meet

उद्योग ते बपार मंत्री पीयूष गोयल होरें आखेआ ऐ जे भारत ते अमरीका दी आर्थिक
सांझ-भ्याली मज़बूत ऐ ते अगड़ी बधा करदी ऐ। श्री गोयल होरें कल नमीं दिल्ली च
अमरीका दे बपार-प्रतिनिध जेमिसन ग्रीर ते भारत च अमरीकी राजदूत सर्जियो गोर हुंदे
कन्नै मलाटी कीती। सोशल मीडिया दी इक पोस्ट च उ'नें आखेआ जे संतुलित ते दौनें
पक्खें लेई फायदेमंद बपार समझौते लेई गल्लबात गी अग्गे बधाने पर चर्चा कीती गेई
ऐ। श्री गोयल होरें आखेआ जे भारत- अमरीका दे कन्नै रलियै आर्थिक सरबंधे गी होर
मज़बूत करने ते विकास ते नमिं काहडें लेई नमें मौके पैदा करने दी दिशा च कम्म
करने गितै वचनबद्ध ऐ।

<><><><><><>

US-Senate

अमरीकी संसद ने इरान खलाफ राष्ट्रपति डोनाल्ड ट्रम्प हुंदे फौजी अभियान गी रोकने लेई इक बिल पास कीता ऐ। एहदे मताबक हुन ईरान खलाफ कोई बी गैह पुट्टने शा पैहले ट्रम्प होरेंगी कांग्रेस दी मंजूरी लैनी होग। इस बिल गी House of Representatives च पैहले गै मंजूरी थोई गेदी ऐ। Senate च रिपब्लिकन पार्टी दा बहुमत ऐ पर 4 Republican सांसदें पार्टी लाईन थमां हटियै इस प्रस्तास दा समर्थन कीता ऐ।

<><><><><><>

IMO- Evacuation Plan -Hormuz

अंतराष्ट्रीय समुन्द्री संगठन IMO नै होर्मुज जल डमरु मध्य च फसे दे 11 जहार कोला मते नावकें गी बाहर कड्डने दी इक योजना दी घोषणा कीती ऐ। संगठन दे महासचिव आर्सेनियो डोमिंग वेज़ होरें आखेआ ऐ कि इस अभियान च मदद लेई जरूरी सुरक्षा गारंटी लैती गेदी ऐ ते इस अभियान च इरान- ओमान ते इलाके दे होरनें देशें ते समुन्द्री उद्योग जगत दा सहयोग बी लैता जाहग। संयुक्त राष्ट्र दे जिनेवा दफ्तरै च- इरान दे राजदूत अली बहरीनी होरें आखेआ कि होर्मुज जल डमरु मध्य कारोबारी जहाजें लेई विजन कुसै टोल टैक्स दे पूरी चाल्ली खुल्ला ऐ। उ'नें इब्बी आखेआ कि इरान ते अमरीका बश्कार गल्लबात दी बिनाह पर 60एं दिनें बाद इस बारी परतियै समीक्षी कीती जाहग।

<><><><><><>

PSC-LG CM Meet

डाक्टर शशी थरुर हुंदी अगुआई च जम्मू-कश्मीर ते लद्दाख केन्द्र शासित प्रदेशों दे अपने 4 रोजा दौरे दौरान विदेशी मामले सरबंधि संसद दी स्थाई कमेटी नै कल श्रीनगर च उपराज्यपाल मनोज सिन्हा ते मुख् मंत्री उमर अब्दुल्ला हुंदे नै मलाटी कीती। कमेटी नै उनें'गी अपनी यात्रा बारे जानकारी दिती- जेहदे च उन्दी सेना दे अफसरें कन्ने मलाटी- बन्ने कन्ने लग्गदे इलाकें दा दौरा ते होर दुआ ब्योरा शामिल हा। कमेटी दे मिम्बरें कन्ने गल्लबात करदे होई एल.जी होरें जम्मू-कश्मीर च आए दे समाजी आर्थिक बदलावें- जारी पैहलकदमियें ते बेहतर सुरक्षा स्थिति दे बारे च जानकारी सांझी कीती। मुख् मंत्री होरें बी कमेटी दे मिम्बरें कन्ने जम्मू-कश्मीर च होआ रदे कम्मैं-कारवाइएं दे बारे च गल्लबात कीती- जिंदे च लोकें दिएं आसैं-ताहगें मुजब जारी विकास ते सुधार कम्म शामिल न।

<><><><><><>

Fifa WC

फीफा फुटबाल विश्व कप च ग्रुप-के च पुर्तगाल नै उज्बेकिस्तान गी 5-0 कन्ने हराई दिता ऐ। पुर्तगाल दे क्रिस्टियानी रोनाल्डो ने 2 गोल दागे। एहदे कन्ने गै रोनाल्डो 6 विश्व कप प्रतियोगिताएं च गोल करने आहले पैहले खड्गारी बनी गे न। उनें'गी Man of the Match चुनेआ गेआ। तौआई ग्रुप-एल च इंग्लैंड ते घाना बश्कार बॉस्टन च मैच ड्रा रेहा। दौनें टीमें गी दंऊ मैचें च 4 अंक हासल होए न। दवै टीमां ग्रुप-एल च अव्वल थाहरै पर बरोबरी पर बनी दियां न।

<><><><><><>

IMD Weather

मौसम विभाग नै दक्खन-पच्छमी मानसून दे अगले दंऊ दिनें दरान महाराष्ट्र/ छत्तीसगढ़ ते मध्य प्रदेश दे किश हिस्सें च पुज्जने दी मेद जाहर कीती ऐ। अगले त्रै-दिन कर्नाटक दे समुन्द्री कंडे आले इलाकें सनें कोंकण ते गोवा च बी मौलेधार बरखा बरी सकदी ऐ। असम- मेघालय- अंदरुनी कर्नाटक- मध्य महाराष्ट्र- ओडिशा- पच्छिम बंगाल ते सिक्किम दे हिमालय कन्ने लग्गदे इलाकें ते तेलंगाना च अज्ज भारी बरखा दे असार न। दिल्ली- पंजाब- हरियाणा- चंडीगढ़- बिहार- राजस्थान- झारखंड- जम्मू- कश्मीर- लद्दाख- उत्तराखंड ते पूर्वोत्तर दे किश हिस्सें च गरज-चमक दे कन्ने बरखा बरने दी मेद ऐ। आंध्र-प्रदेश- तमिलनाडू- केरल- माहे- कोंकण- गोवा- लक्षद्वीप- मध्य प्रदेश- महाराष्ट्र ते अंडमान ते निकोबार टापुएं च बी अज्ज नेह गै हालात रेही सकदे न। पूर्वी मध्य प्रदेश- पूर्वी उत्तर प्रदेश ते विदर्भ च कल्लै धोड़ी लू चलने दी शेंका दस्सी गेई ऐ।

<><><><><><>